

BUSINÀ 84°

2008-2009

(Bellinaso Fabio – Raiteri Pier Luigi)

Buna sira, buna sira me cari siuri! C'mè c'la va?

U smejia ieri c'as suma vist e a l'è zà pasà in ani; e cun ist i son utòntaquatr'ani c'a fuma 'sta Divòta Cumedia e a j'uma intension d'andè avònti ancura; e sé, perchè s'i v'a stufi nénta voi ad vigla, figürumsi noi ad fèla!

Prüma 'd c'mensipiè, auvriva ricurdè in amis che da ist ani um uarda dal Paradis: Luciano Ghirri. A l'era chi ansèma a noi, an s'ist palc a cambiè i scenari; us rampgnava sü dal scali c'mé in gat, a l'ava na parola d'incuragement per tücc, a l'era sèmpè suridént, e noi auruma ricurdèli acsé: "Ciao Luciano, 't sarrai sèmpè ant i noster cor!".

Ist ani a j'avu pensà 'd fèv entrè cul savati, perchè aurjsa nénta che a cuc d'èn, c'ui pias nénta la Businà, us gaveisa el scarpì e u mia tireisa ant el mur, c'mé c'u j'è capità a Bush!

Adès però parluma an pò' 'd Lisòndria. Prüma roba, auriva fè j'augüri ai Grigi che i j'hòn cumpì sént' ani! I son pü vègg che me e i stòn andònda fort. I m'hòn dicc ch'i son prüm an classifica. Am racumònd, t'ni dür che d'is pas a turnuma an serie A c'mé na vòta!

Girònda per la sità a j'hó nutà che la nova Aministrasion u n'ha facc di travaj eh... A l'ha cambià el culur del striscij pedunal, da rusi i son 'dventaij blèu e um smejia ch'i voru vernisè ònche el Municipio, acsé da Palazzo Rosso u 'd'venta Palazzo Azzurro. In'atra bèla surprèja a l'hó avija rivònda an Piasa dla Libertà: i j'ei vist che bèl vilagi ad ligna ch'i j'hòn facc? Tüti vilèti ugual e bèli, ma pitost citi, però i m'hòn dicc che ij'amsüri u j'ha piaij u Sédich!

Pó a son andacc sü da Via 'd'la Vitoria an Piasa Marconi e am son trovà ant in bosc! Piònti, erba, fiù... e pensè che trei dì prüma a son pasà da lé e u j'era gnènte. Adès a voi parlè cun u giardiné c'l'ha piantà is piònti e ciamèi c'mè c'l'ha facc an trei dì a fè 'mnì di muron gròs acsé!

Pó a j'hó proseguì e e son rivà an Piasa Garibaldi e lé a j'hó avì in'alucination. Aughiva i babaciu ch'i caminavu an sel faciadi del cà! E pensè ca j'era nénta ciuc e pó am son antajà c'u j'era del luci ch'i pruietavu is figüri: im peju an gir!

C'mé c'av diva, a suma rivà a utòntòquatr'ani, l'è veira che la vita a s'é slungaija, ma i macuè ij'augmentu e a perduma i tòc per la strà c'mé 'l machini. Acsé per fèv la revision, vist che ai stuma pü a l'uspidal vègg, a i j'hòn pensà 'd fèni jën nov e i voru fèli al Crist. Però i devu spieghèm se c'u serv cul casermon ch'i stòn tirònda sü ansüma al Pronto Soccorso. Pó a j'hó ciamà c'mèla

mai ch'i j'hòn decis 'd fèli al Crist e i m'hòn dicc che quòndi ch'i spustarròn i malavi s'ui sarà d'la cunfision e s'us furma la coua, i parcheggi i spustarròn tücc al Galassia.

Però amni vègg a l'è düra cun la pension c'l'augmenta mai. Cui quat' sold che 't avi da part, i tj hòn brüsà, acsé 't veni nervus e 't rüsiij cun la mujé. Però uarda me c'l'è la vita: quòndi t'eri giuvu e 't aurivi sorti, to mujé u 't lasava nénta, adès che 't ei vègg e 't'aurijsi stè a cà tranquil, u 't dis: "Se 't fai sémpr'an cà, va' a fè na gira, va' a vighi au supermercà s'u j'è cuc cosa ad cunveniént da crumpè!". Pénsè che in me amis a l'è andacc au supermercà e a l'ha c'mensà a girè, ma a l'aughiva gnénte 'd cunveniént. Acsé per nént sbaglièsi a l'è andacc ant u repart 'd la verdüra per piè in chilu 'd mandaren; e lé i son c'mensà i probléma. Ma voi i pénsi per sèrni i pü bei, cui pü culurà: no!, per dróbi u sachèt! A n'hó vist ad tücc i culur: cui ch'is lapu i di, cui ch'i fruci; a n'hó fina vist jën che bifònda u j'è partì la dentera! Va bén, na vòta duèrt u sachèt, a l'ha pià i mandaren e l'è andacc a cà. Quòndi c'l'è rivà so mujé u l'ha sübit investì: "Ma pusibul c'at'iabi bütà du uri per crumpè in chilu 'd mandaren?!". E lü u j'ha dicc: "Uarda che in'ura a l'hó perdia per dróbi u sachèt!". Però per fès perdunè: "amore! amore!". U fa, e lé: "'T a ml'hai mai dicc an quarònt'ani 'd matrimoni e 't a ml'a disi adès!" - "No, sta da sénti: pròpi ancó a j'hó ricevì dal Guvern la Social Card". "E se c'l'è?". Ai fa lé. "A l'è la carta servisi che 't póri spèndi in mügg ad sold e a voi fèti in bèl regal. Preparti c'a anduma a fè shopping". Ui rispond lü. Acsé i vòn an sità e i uardu an pò' 'd vedreini e lü ui dis: "Uà 'n pò', paltò des euro, giaca ót euro, gòna sing euro... uarda, trai veia tüta cula ratatuja che 't hai ant el guardaroba e 't crompi tüt nov!" Lé ul uarda e ui dis: "'T ei pròpi rimbambi, ma a vigti nénta c'l'è na lavanderea!".

L'ater di a j'hó anviscà la television e i j'hòn dicc c'a suma an recesion, ...perchè noi a l'avu nént capì! E che na vòta, quòndi ch'el ròbi j'andavu bén, u j'era u travaj per tücc. U travaj a l'era a témp indeterminato; pó a suma pasà au travaj 'a tempo determinato', adès u travaj a l'è 'terminato' e i j'hòn tirà fora tücc si cuntrat cun di nòm strampalà, *co.co.co – co.co.pro – co.co.dè...*, a fuma pròpi reij fina el galeini!

An primaveira u j'è stacc j'esion e a l'ha vensì la dricia, acsé tüt la cualision a s'è riunija e Berlusconi a l'ha dicc che l'Italia la dèu ripartì cun la velocità 'd na Ferrari e che lü el fa el mutur, e Fini u j'ha dicc: "Se te 't fai el mutur, me a fas la carusereia", e Bossi: "Te Silvio 't fai el mutur, te Gianfranco 't fai la carusereia, me a pos fè el róvi". Da lé ui pasava Mastella e ui fa: "Stè da sénti, me a j'hó gnénte da fè, s'i sei d'acordi a pos fè u tergiacristallo, antònt a vag an pò' a dricia an pò' a sinistra!".

Ma la surpresa veira a l'è nénta c'l'ha vensì la dricia, ma c'u j'è sparì la sinistra, acsé per serchè 'd fès an pò' 'd prupagònda, i j'hòn mandà a cula tra-

smision 'cultural', 'l'isola dei famosi', cul bèl omi, ah no, cula bèla dona, ma sé, Luxuria, e a l'ha vensì. A l'ha pià pù vut lé che tüt la snistra arcobaleno, acsé i j'hòn decis che el prosim Cungres il fòn an sl'isola dei famosi! E pó u j'è el Partì Demucratic c'l'è a l'Uppusion e a l'ha facc el 'Governo ombra'. Però u j'è stacc Fassino c'us l'è piaia perchè i l'hòn scartà. E lur i j'hòn spiegà el mutiv: "Fassino, 't ei gros c'mé in grisen, che ombra 't vori fè?!". Però ònche noi, chi a Lisòndria, a j'uma avì la sudisfasion 'd mandè a Ruma in 'Onorevole' e lü per tradision tücc i sabét, quòndi ch'el ven a cà, el va a fès rangè i cavì dal prichè. La quistion a l'è che, tüt el vòti c'l'entra, el prichè u dis: "Onorevole, l'è stacc a Ruma? L'è andacc dal Papa?... No? E c'mèla mai?". E l'Onorevole: "Perchè a vag a travajè!". E dop na smouna us ripét la medesima storia; dop an pò l'Onorevole u s'è stufà e al pénsa: "Adès at sistém me...". In bèl sabét l'entra dal prichè c'ui dis: "Oh! Onorevole, el stacc a Ruma? Sé? L'è andacc dal Papa? Sé?". "Sé, a son andacc. Ma a l'è nénta stacc facil. A j'hó duvì dèj i documént. Pó a son pasà ant na stònsa e i m'hòn cuntrulà tüt. Dop du uri c'a spiciava, a l'è rivà u segretari del Papa e u m'ha dicc che el Pontefice el pudiva ricevmi. Quòndi c'a son rivà davònti al Papa, a j'hó pruvà in'emusion c'us pó nént descrivi. A j'ava la pèl d'oca... Am son ausinà, a j'hó pià la mòn e ai l'hó basaia e lü u m'ha бүтà l'atra an sla testa...". E el prichè, tüt ansius: "E se c'u t'ha dicc?". "Chi c'a l'è cul digrasià c'u t'ha tajà i cavì?!". Adès però la piònt lé, perchè s'i vori sénti na predica i j'andei an cesa e a l'è pù bèla e la custa gnénte! Av presént la me famija...